



UNIVERSITÄTS-  
BIBLIOTHEK  
PADERBORN

Provincia Rheni.

---

[urn:nbn:de:hbz:466:1-67132](#)

271

# PROVINCIA RHENI.



**A**B VIT hoc anno de nostris Provinciæ Rheni trecentos, & viginti-quinque. Coloniæ unum, & trigin-  
ta. Treuiris duos & septuaginta.  
Moguntiæ undesexaginta. Her-  
bipoli duodequinquaginta. Spiræ  
septemdecim. Fuldae duodetriginta. Heiligensta-  
dij quatuordecim. Molsheimi septem & viginti.  
Sexdecim Confluëtia. In Paderbornensi sexdecim.  
In Luxemburgensi tres. Obiere nouem. Iniere So-  
cietatem unus & viginti.

## COLONIENSE COLLEGIVM & Treuirens.

**I**N Colonensi Collegio omnes omnia ad anima-  
rum salutem conferunt. Hæretici duodetriginta  
perspectis sua sectæ mendacij facile sibi persuaderi  
veritatem Catholicam passi sunt. complures au-  
tem, quorum lababat in Ecclesia fides, ad constantiæ  
reuocati. Gymnasiū (ut his temporibus) satis refer-  
tum auditoribus: quamuis enim multi in Belgium,  
unde huc exulauerant, se retulerint, multosq. uel  
fames

fames affixerit, uel sustulerit pestilentia, milesq.  
hæreticus omnia circum urbem longe lateq. vasta-  
rit; tamen auditores remanent septingenti & quin-  
quaginta, quorum pietas in proximum quemque  
redundat. nam & à flagitijs homines retrahunt, &  
doctrinæ Christianæ rudes instituunt, & de suis for-  
tunis in egenorum uictum multa conuertunt. inter  
hos palmam ferunt, qui latent in tutela Dei Paren-  
tis, quorum Sodalitas feruet his studijs quotidie ma-  
gis. Declarat in placando Deo assiduitas precū, cre-  
bra ieiunia, uictus asperitas, officiosa in calamitosos  
ac miseros charitas. quibus rebus singulis adiungi  
possent exempla, si aut ea dissimilia essent eorum,  
qua commemorata sunt alias, aut instituti nostri ra-  
tio pateretur. Nec uero è tam probe instituta iuuen-  
tute defunt, qui Societate nostra ineunda, perfecta  
uirtutis iter ingrediantur. ingressi sunt octo; atque in  
his, Colonensis cōsul's filius, qui parentibus annua  
pugna deuictis, Apostolici Nutij auctoritate, tandem  
uoti cōpos est factus. Alius nobilis adolescens media  
susceptus & educatus in hæresi, cum audito con-  
cionatore nostro, Societatem subito adamasset, tradis-  
tur à parentibus in custodiam, ne cogitata perfice-  
ret. sed cum diuinum numen crebris precibus im-  
ploraret, extorsit à matre denique, ut per eam sibi  
liceret, Deisalutandi cauſa proximam secedere in  
adēm. inde Coloniam uersus iter arripit, omnis  
expers uiatici, omni subsidio destitutus. in hac ino-  
pia & egestate non puduit Christi cauſa, mendico-  
rum more querere passim cibum: cumq. ad capo  
nem

nem diuerteret, nec soluendo esset, pallium obtulit pro argento. sed adolescentis probitate perspecta, pecuniam capo remisit. Itemq. Rhenum cum traiiceret, & nauum nauarchus exigeret, oblato iterum pallio, iterumq. sibi relicto, tandem peruenit ad nos, suo doctus exemplo, quam eis nil desit Christus, qui se nudi & expediti sequuntur.

T R E V I R I S quoque nostri, omnes partes aliae salutis & cum alacritate suscipiunt, & cum laude constantiaq. sustinent. Annexatur huic Collegio Novitiorum domus è sex & viginti tironibus. quotidieq. ad nostram familiam alios expolit Deus: sed angusta res facit, ut per paucis tantù aditus pateat: quibus autem patuit, iij partim secum, partim cū parentibus bella gesserunt, & ex utroque certamine triumpharunt. Quidam cum sciret se steriliū parē tum votis in lucem editum (iij enim, cum prolē natu ra negaret, auctori naturae Deo voverūt, se ei filiū, se quem parerent, dicaturos) ut parentū vota persolueret, Societati se reddidit: tantò ardenter in colenda religione futurus, quantò plus imponitur oneris gemina obligatione uoti, parentū; & sua. E gymnasio, quod octingētis fere auditoribus cōtinetur, in Societate adsciti sunt tres. E templo autē sacrisq. confessionibus, quæ quidē fuere creberrimæ, copiosa ad animos profecta utilitas est. Feminis, quæ se totas ad alienas libidines porrigebāt, persuasum est, ut et animo & pudori consularent. Rescissa sunt etiā matrimonia nefaria: plurimiq. ab hæresi reuocati. Et quoniam hæretici quidā & in sacras imagines, & in ipsa

S sacro-

Sacrosancta Eucharistiae mysteria sacrilegas ausi manus iniij cere, plectèdi pro meritis erant, curatū est à nostris, ut ex his aliqui resipiscerent, imbutiq. antea veritate, suppliciū a quo animo ferrent. Adhibita est præterea desperatione oppressis medicina solatijs, & quoad fieri potuit, sathanæ dolis occursum. Mulier cum ex dissidio coniugis mærore tabesceret, diabolus in atrum virum fæde conuersus, spectandum se femina præbuit: cui quamquam primo terrori fuit, mox tamen metum familiaritas sermonis ademit. narrat alienissimo à se animo coniugem esse, nec spem ullam redintegranda gratiæ relinqui: quo circa viro posthabito, se maritum sequatur. mulier vari hostis circumuenta fallacijs, & largis capta promissis, admittit incubum, auroq. multo dotis loco locupletatur: sed cum manus auro argentoq. plena existimat, sterquilinio sentit esse repletas. redit iterum incubus, & in viri necem venenum offert, negatq. ullam fore umquam animi quietem, nisi is de medio tollatur. cum mulier tam sanctæ memor necessitudinis abnuisset, eamq. diebus aliquot lapsis in superiori ædium parte diabolus offendisset, nec tandem ad id scelus adigere potuisse; repulsa contumeliam non ferens, medium arripit, ac de scalarum gradibus præcipitem agit. consilium miseræ datur à prudenti femina, ut rem cum Sacerdote nostro communicet, & animum accurate componat: sic fore ut tanto malo lenationem inueniat. paruit consilio mulier, expositaq. re tota Sacerdoti nostro, quicquid etiam ex admissis in superiori vita noxis stimulabat ani-

animum, confitetur. ab eo spe diuinæ venia ac bonitatis erecta, monitaq. vt in tam graui periculo soq. certamine ad sacramentorū præsidia crebro confugeret; minuit imbecilla femina uires fortis armati. Tulit hoc diabolus perinique, & mox mulieri perfidiam exprobrans, eius etiam deridere stultitiam, quæ vnius hominis instructa monitis, aliquid se posse consideret: vicit tamen muliebris pietatis perseverantia, vt, quamuis ei interdum sese hostis obijceret, obijciatq. eminus etiamnum; eum tamen crucis signo facile fuget: speraturq. fore, ut propediem dinnis stratus opibus evanescat; & feminæ certamen horreat, qui tantum suis telis viribusq. præfidit. Sed non vnis modo artibus humanas animas ad aeternam felicitatem genitas inuidus hostis oppugnat: alijs alias ad perniciem tendit insidias: sed a nostris opera datur, vt in sua quisque pugna periculoq. iuuetur. Pro sagarū ac ueneficarū salute, quarū in his locis magnus est numerus, pugnatū frequenter est. ha si forte in suo criminе deprehēdantur, quod quotidie fit, uiuis integrisq. corporibus exuruntur. sed eas ad extremū supplicium nostrorū pietas comitatur, tanto cū illarum bono, ut genus ipsum mortis & detestatio uitæ praterit & spem afferat non exiguum, fore, ut eæ celeri flamma, semper ita vitent incendia. Ex his una tenerū puerum octo circiter annos natum, suis præstigiis ac carminibus circumuentum, in eas sedes solita erat abducere, ubi per licentiam noctis ac tenebrarum nefarij lusibus indulgerent. hic suæ quoque partes puero dabantur, ut dum illæ choræas

S 2 con-

consertis manibus inter se ducent, is earum saltationem tympano prosequeretur. nec modo ludorum erat choriq. spectator, sed saepe etiam præstigiarum, quibus humanis illæ corporibus vitiisq. nocent. hunc Archiepiscopus deducetum in aulam custodiri iussit, ut catechismo, cuius erat plane rufus, imbuatur. cui sacerdos noster cum effigiem cœlestis Agni de ceruicibus suspendisset, noctu adfuit dæmon, grauiterq. puerum increpans, quod tam facile se decipi passus esset, iussit ceram illam, ni vapulare vellet, abiijcere. territus puer imperata fecit, continuoq. dæmon, eo iam, quod metuebat amoto, ad muros urbis eum abripit, nigroq. impositum hirco, ad impurissimas sagarum regiones momento transfert. qui cum aliquandiu inter veneficas latitasset, restituuntur iterum in palatium, fracta implicitaq. nodis resticula, unde cera illa pendebat: quo maxime inditio pater ad harum rerum cognitionem scientiamq. perueniebat. Multa autem puer ipse narrabat, quæ cum ue- neficarum iudicarijs confessionibus congruebant: ut longe à simulatione absuisse videri possit simplicitas puerilis, si cui hæc forte uiderentur inania. Gu- bernator & Archiepiscopi auctoritate permoros, & ipsius nomine ciuitatis, petiit, ut in Collegium puer includeretur, dum ea probe, quæ disciplinam Christianam continent, doceretur, ut cum postea redisset in aulam, sacramentis religiose tractandis, à præstigijs dæmonum tutus esset. id quod denique factum est. Missi sunt foras duo de nostris, Archiepi- scopo postulante, ad restituendam cœnoliticam disci- plinam

plinam in Prumiense cœnobium . est hoc cœnobium  
è B. Benedicti familia, quod octo millia passuum Tre-  
niris abest, à multis olim Galliæ Regibus locupleta-  
tum & auctum . octauum iam mensem morantur  
hic nostri, non sine magna, tum cœnobij, tum vicini-  
tatis utilitate. reuocata est vetus psallendi precan-  
diq. consuetudo, diurnis nocturnisq. temporibus:  
sublatæq. singulares mensæ , & ut religiosos cœ-  
nobitis decet, una omniū communis inducta: repressa  
etiam multarū rerum licentia, & ad sanciendā cœ-  
nobij disciplinā sua cuique noxa proposita pœna. Vi-  
cina vero iuuentus, et pietate, et literis informatur,  
sed, quod caput est, multo magis præceptis institu-  
tisq. Christianis, quorū vulgo magna est ignoratio.

COLLEGIVM MOGVNTINVM,  
Herbipolense, & Spirense.

**N**E C vero in Moguntino Collegio languidio-  
res facti sunt nostri, quorum omnium animus  
ad liberandos à periculis animos est intentus. Qua-  
tuor aucti sunt socijs, quorum unus magister artium  
è Romano Germanorum Collegio profectus, ad eos  
denique rediit, à quibus bene viuendi disciplinā ac  
litterarum acceperat. Nec parua ad Catholicos fit  
accessio. sexdecim enim accesserunt. Sed domi eo-  
dem loco sunt omnia, eaq. cum reliquis collegijs do-  
mibusq. communia. Francofurti, ubi celeberrimi-  
num est Emporium, concionator è nostris spatio  
fere trimestri magna Catholicorū, quorū exiguus est

S 3 numerus,

numerus, voluptate exceptus est. Quinquagesimum iam annum, nec ad concionem, nec ad sacramenta tā multi cofluxisse dicuntur, quam paucis illis diebus: qui quidem numerus à promulgato noni Pontificis Iubilao sic increbuit, ut ad excipiendas confessio-nes ipsa quoque adhibenda nox eſset.

HERBIPOLI adiuncti sunt Ecclesiæ ca-tholicæ hæretici quadraginta. foris amplius octin-genti. nam cum Principis auctoritate nutuq. inspi-cienda eius ditio fuisset, edixissetq. ut qui ad sanita-tē redire nollent, è sua ditione faceſſerent; eò expe-ditior ratio fuit tantæ multitudinis adiungendæ. Duo in eius obeunda diœcesi etiamnū de Societate ver-santur: nec dubitamus, quin ad hunc diem eorum vigilijs ac laboribus amplificatus sit numerus. Ac-ne ad singulos, qui resipuerunt, hæreticos delaba-mur, hoc vniuerse confirmare possumus, ex ijs mul-tos, qui dederunt manus, aut incredibili pertinacia fuiffe, aut ea auctoritate, vnde magnum animis peri-culum crearetur, si in hæresi permanerent. In his quidam diuinitijs affluens, & obſfirmatus in hæresi, malens de patria, quam de ſententia decedere, bona omnia fortunasq. diuendidit. sed dum alio eius fami lia migrationem parat, fluumq. Hippagoga trans-mittit, repentino ſclopi ſonitu iumentis exterritis, nauis, qua domesti ci vehebantur, omnium periculo inclinatur. continuo cum liberis uxor excutitur. li-beri fluctibus absorbentur: mater autem tum quidē emersa, triduo tamen post expirauit. quo caſu admo-niti alij, qui fugam ſimilem adornabant, conſilium muta-

mutarunt: in ijsq. illius transfugæ parens: vt vterque domesticæ calamitatis superstes sentiret vim præsentem diuini supplicij. Iam de ceterorum curatione vitiorum nihil attinet dicere: his enim plena sunt omnia, vt otiosis nostris esse non liceat, si ea conentur excidere. Vsus quoque sacramentorū creberrimus fuit. Facit autem pientissimi Præfulis animus, vt optime de toto hoc Franciæ tractu sperare iam liceat. et quamquam religionis hostes non defuerunt, qui Principem ab institutis conarentur abduce re; numquam tamen de optima mente se deicí passus est. Nostrī quasi in eius studijs magnitudine partem habeant, apud improbum genus hominum pessime audiunt: atque idcirco eis cum noceri potest, minime parcitur. Horreo, quod habebamus in pagis, inieictum incendium est: onesq. superioribus annis veneficijs ac carminibus fascinatae: quæ cum quotidie interirent, nostri cera et aqua rite benedictis omnem vim fascini Deo fauente fregerunt, verum in beneficij parte ponimus, quicquid iniuriarum ab aduersarijs accipimus, hoc uno tantum solliciti, quod qui lèdere se nos putant, suas ipsi animas grauiter vulnerant: nec locum medicinæ relinquunt, dum quotidianè deteriores effecti nouas sibi plagas impo-  
nunt.

S P I R.Æ quoque enixe animorum libertas salusq. defenditur. Ab heresi viginti minimum sunt abducti, quorū plerique ætates ferme integras in suis tenebris iacuerunt. maior quoque prædasperratur in dies. nam & tractantur crebrius sacrosan-

S 4 Etia

ta mysteria, et confitentium rite peccata numerus est vberior. quod tum maxime declaratum est, cum Xistus Quintus edidit Iubilatum. quo quidem tempore communicantium ea vis fuit ( id quod heretica in ciuitate mireris) ut si saepe appareat hæc in ade nostra celebrites, cogitandum existimat viri principes de amplificando laxandoq. templo. pietatem hominum par benignitas comitatur, nihil ut pene in ade nostra alicuius pretij sit, quod non hominum liberalitas erogarit. Et ut sunt, qui sacram supelle-  
talem semper augeant, ita non desunt, qui conferant in domesticam, ut tanto magis ad animarum salutem nostrorum excitetur & acuatur industria. Sed dum huic ciuitati Societas profuit, partem aliquam suarum cogitationum in alia quoque oppida deriuauit. Bada vrbs est una de primarijs, & Marchioni subiecta. hic Lutherana mulierem annum iam quartum & trigesimum septem dæmones exercebat. ejiciendus primo fuit ex anima diabolus, priusquam ejiceretur e corpore. dedit igitur operam pater e nostris, ut Lutherum detestata mulier, verum Christi Vicarium catholicæq. Ecclesiæ caput agnoscere, in eiusq. potestate esse vellet. quod cum impetrasset, tum demum liberare corpus aggreditur. habuerat mulier ex eadem Lutheri face ministros auum & patrem, Badamq. venerat multis cum litteris, quibus fidem & Saxonicas ciuitates, & lutherani ministri faciebant, eam malii dæmonis obsidione teneri, frustraqueq. eius apud se liberationem esse tentata. Institutum certamen est publice cum dæmonibus, in media

media hæreticorum turba, qui è vicinis quoque pagis oppidisq. confluxerant. complebatur quotidie templum, omnesq. quorsum res euaderet, expectabant. Pater non suis opibus, sed diuina misericordia fatus alacriter rem urgebat. fatebantur dæmones, aniculae cuiusdam execrationibus, sibi esse olim, cū etiam tum mulier esset infantula, in eius corpus adiutum patefactum. ut igitur inde sacris carminibus abigerentur, quò nefarijs execrationibus immigrant, assidua aliquot dierum opera, tū publicis exorcismis, tum precationi data est: dum ad extremum eximia Dei bonitas filij sui meritis hoc concessit, ut cuius vi nominis tartara contremiscunt, eiusdem nutu ac potestate tetra illa conspiratio dæmonū perleretur. Confodit tā pulcher euentus hæreticorū pectora, qui cum, quò se verterent, non haberent, nimio rubore perfusi, obscurare mendaciorum impudentia conatis sunt veritatem: sed diuino consilio factū est, ut dum pro concione in Sacerdotem nostrū Luthera norum signifer debacchatur, negatq. nullū ab eo dæmonem pulsū esse, tum forte adolescens peregre rediens, temeraria sclopi displosione sit ictus: qui cū moreretur, ignorareturq. virarū esset partī, Catholiconē, an hæreticorū proximas defertur in aedes: ad eumq. Catholici, Sacerdotē quem dixi nostrū: lutherani vero suum ministru accersunt: sed hi tanta cū festinatione studioq. ut Catholicos anteuenterint. hortari igitur Minister adolescentē, ut christiane mori velit, sordidoq. è sacco panem suū, quem moribundo obtrudat, exprimit. sed longe alia mens erat  
adole-



adolescenti. significabat se potius veræ Ecclesiæ sacramento velle muniri, & ritu institutoq. Catholico confiteri. furere hic & stomachari minister, & perfidiam grauiter exprobrans, atrocem minarigebennam: multa etiam de religionis veritate vanitateq. multa de diuini severitate iudicij, imperite insciteq. differere. que omnia adolescens hoc uno dicitur elusisse responso, Experietur uterque nostrum priusquam hora quatuor & viginti præteruolent, utra tandem in religione mori sit tutius. interim Sacerdos noster accedit, & abeunte ministro confessionem migrantis excipit. moritur hic, ut vitam inchoet sempiternam: moritur ille postridie, quemadmodum ei prædixerat adolescens, ut aeterna morte multetur: cum pridie tamen valens atque integer visus esset, ita sentit uterque, utra religio sit verior, & quæ apud inferos mancant haereticis pœnae, & quæ Catholicis apud superos gaudia.

FULDENSE, ET HEILIGENSTADTENSIS  
diense Collegia.

**F**ULDÆ eodem studio hominū commodis salutis seruitur. est gymnasii opus egregia Caesaris, & qui huius vicem gerit, benignitate perfectum. constatq. auditoribus quadringentios, numero non exiguo, si quibuscum agatur, animaduertas: nam haereticis sciatent omnia, ex quibus ipsis, quamquam à nobis in religione dissentiant, complures tam suos ad nos liberos mittunt, quibus una cù doctrina salutaris veritas instillatur. Datur autem opera

opera, ut & pueri nonnumquam, & eorum parentes spectaculis capiantur. est enim illis iucundissimum suos videre filios tanta cum laude in oculis luceq. omnium suas tueri ac sustinere partes. Ac magno sane animarum compendio, Societas in hac erudienda iuuentute versatur non enim infirmis mentibus, quamquā s̄aþe sit atas infirma, cōmittitur virtus. & ubi percepta semel ab eis est veritas, extorqueri nullis terroribus potest. Tres fratres nobiles cum se ad Catholicos appulissent, mater hæretica duos iuniores abductos, nam filium natu maximum abducere omnino non potuit, ad hæreticorum scholas in aliud oppidum mittit. illi vero datis adfratē litteris, significarunt, sibi quidem, ut materna cederent iracundia, obtemperandum eius imperio fuisse; sed tamen membrorum potius singulorum sectionē, totiusq. mutilationem corporis perpeñuros, quam vt à suscepta religione desciscerent. Alius item è nostris auditoribus adolescens, cum Christianam religionē, hæresi relicta, caste iam coleret, monereturq. ab hæretico fratre, vt ex disciplina nostra, vel ad hæreticam Marburgensem academiam se conferret, vel secum rediret in patriam, minareturq. ni paruifset, sumptus se ei nullos in posterum suppeditaturū; Ab eas tu, inquit, licet in patriam frater: nam si vos restrum sequunt magistrū, fide sic abundatis, vt eam vobis vnam existimetis aditum in cælum fore, ego de Dei prouidentia dubitare qui possum? aut quid metuam, ne si à vobis deserar, corpus hoc alat? ita reliquo fratre Fuldam rediit, ac ne quid sibi cum domesticis



mesticis amplius eſſet, vitam vt inter nos degeret, postulauit: vt cui animi salutem referret acceptam, ei ſe familiæ dederet in perpetuum. Sed quo studio religionis iuuentus hæc flagret, nihil eſt opus hoc exemplis facere longius: tantum gratulandum eſt Deo, ab eoq. petendum, vt, quod iam videtur iſtituiſſe, feliciter hanc iuuentutis academiam prouehat. Dedit enim Summus Pontifex ad Teuthonici Magistrum ordinis, & Abbatem probitate preſtantem, huius Collegij fundatorem per honorificas litteras, quibus non ſine Societatis commendatione pollicebatur, excitatū ſuperiore anno à Gregorio XIII e nobilibus Seminarium, magnæ curæ ſibi fore. Ac praeter eos quadraginta nobiles adolescentes, quos ſuis ſumptibus Fulda ſuſtentat, decreuit etiam ſtudia pauperum ſexaginta, liberali quotannis iuuare ſubſidio; ne tenuioris fortunæ discipuli ad hæreticorum ſcholas, vbi hæc illis ſubſidia non defunt, deſtituti confugiant: que res cum magnam in his locis, vbi omnia ferme hæresis occupauit, admirationem habet, tum amabilem cunctis Pontificem reddit.

Sed vt abeamus à ſcholis, cuſtoditur diligenter & ceterorum ciuium ſalus & paganorum. Fuit in hac ciuitate Sacerdos magni nominis concionator, ad quem tota ferme ciuitas confluēbat: quod et ſpem faceret communionis Dominicæ ſub vtraque ſpecie reſtituendæ ( eam enim ſub initium Collegij noſtri iuſtulerat is quem dixi fundator ) & familiam noſtram iuſſetaretur: vt tantum non ad hæresim vergere eius & mens & oratio videretur. Hic dum deſcribitur

sacrilegis nuptijs magnorum virorum patrocinio ni-  
xus, non minus libere, quā impudenter agit, repēte,  
equissimo Dei iudicio, mortifero correptus est mor-  
bo. nostri ut suas iniurias benefactis remuneraren-  
tur, agro corpori animoq. succurrentum putarunt.  
hortantur ut se ipse respiciat, & meditatū facinus  
detestetur: quod ille & fecit, & qui tandem sinceri  
amici numerarētur, agnouit. agenti quoque animā  
præstò fuerunt, funus curarūt, oratione funebri mor-  
tuum, ut solet, ornarunt: ut admirari se vehementer  
dicerēt lutherani, quod nostri & viuis nossent inimi-  
cis benigne facere, & vita extinctis. Huic postea Sa-  
cerdos suffectus est alius, Collegij Germanici alum-  
nus, qui magna cum magistratum, tum ciuium ap-  
probatione suo muneri præst. Nec minore laude  
alumnus alius disciplinæ nostræ se gerit in Mogunti-  
na diœcesi, cui parochus est præpositus. is cū & hoc  
& superiore anno pro incolumitate frugum suppli-  
cationes publicas decreuisset, idq. à ciuibus reli-  
giose institutum susceptumq. esset, derisus à luthera-  
nis & caluinistis est, affectusq. cum suis ciuibus cō-  
tumelia. sed Deus qui rebus non indormit humanis,  
immissa tempestate fruges omnes hæreticorum per-  
didit ac deleuit: cum tamen Catholicorum agros, qui  
aut continent, aut etiam permixti cum eorum pos-  
sessionibus erant, calamitas non attigerit. Huic affi-  
ne est, quod de alio quodā parocho finitimorū pago-  
rū cognitū est. qui cū de sacerdotiis nostri cōsilio, quē  
ad confessiones adhibebat, suis persuasisset, ut prius  
quam mane se conferrent ad opus, ad impetrāndam  
cæli

cœli serenitatem, frugumq. conseruationem, templū religiose peteret; subito exorta tempestas, nihil dāni ipsorum fundis ac segetibus intulit, cum tamen ceteris non pepercit.

Non minor HEILIGENSTADII in tractan-  
dis hæreticorum ingenij vtilitatis est fructus. re-  
siperunt vndecim. & quidem ex ijs, qui ferebant  
inter suos primas. sed quod gratulandum est ma-  
gis, ceteri quotidie dimitigantur, vereriq. iam inci-  
piunt Romani Pontificis nomen, & Catholicas ceri-  
monias, quas hæreticorum deridet impietas. Nec  
minimum auctoritatis Catholicis attulit Iubilei  
proximi promulgatio. Promulgatum est autem à no-  
stris pro concione: nam quoniam tale aliquid in ciu-  
itate nemo vñquam vel viderat, uel meminerat;  
Archiepiscopì Vicarius, is qui Moguntini Archi-  
præfulis nomine, clero præsidet vniuerso, consentien-  
te Canonicorum Collegio, rem totam Societati per-  
misit: ut quid illa in suscipiendo colendoq. Iubileo  
præscriberet, id ratum in vulgus esset. Nostrî quo  
splendidius cuncta peragerent, eademq. opera res  
Catholica sanciretur, supplicationes triduo decer-  
nunt, instituuntq. ut sanctissimum Christi corpus à  
Vicario illo, quem diximus, magnifice circumferre-  
tur, pompamq. ipsam liturgia solemnis exciperet.  
Itaque portis urbis occlusis, indittaq. ab operibus  
feria tamquam iustitio quodam, nihil est à Clero ex  
his, quæ Societas decreuerat, prætermisum. Per-  
etis Missarum solemnis cum ad rei nouitatem fre-  
quens populus accurrit, habita est à Sacerdote no-  
stra

stro de opportunitate Confessionis, quæ Pontificiam  
præcurreret Indulgentiam, per utilis concio. aderat  
hæretici multi, qui è uicinis quoq. locis affluxerat,  
sed ea modestia ac compositione oris, uix ut eos à  
Catholicis internosceres: nec quisquam tam perfidus  
est inuentus, qui non proiectus humi, dum sacra  
pompa ducebatur, suum in Eucharistia Dominum  
adorarit. ea postea cum plurimo tum uirorum tum  
feminarum numero cōmunicata est: nihil ut simile  
perspexerint oppidani. quin hæretici ipsi religionū  
sanctitate capti, confessi sunt, nihil tale apud se repe-  
riri, neque quemquam tam barbarum aut immanem  
eſſe, quem ritus illi ac ceremonie non capiant. At-  
que utinam plus apud eos momenti diuinus, quam  
humanus metus haberet: nā illi melius suis rebus  
salutiq. consularent. nunc autem partim ueriti hære-  
ticorum Principum offensionem, quorum imperio  
subiecti sunt, partim sermones imperitorum, ne quā  
perfidiae notam subeant, si à suis se segregent ac  
disiungant; manent in institutis patrijs, perspicuo cū  
periculo sempiterne mortis. Deus est imploran-  
dus, ut qui prauis iam mentibus lucem aliquam  
prætulit, uires etiam suggerat uoluntatibus. Sed ut  
urbana mittamus, cum pagis etiam nostrorum com-  
municata sunt studia. Lustrata sunt in ijs cœnobia  
uirginum, earumq. excepta confessio. cumq. ex  
bis cœnobij aliqua, dilapsa iam ueteri disciplina,  
nihil aliud præter religionis nomen haberent; nunc  
nostrorum restituta laboribus ita se tuentur, ut in  
eis aliquod iam pietatis ac solidæ religionis lumen

appa-



appareat. Sed quod in his locis maxime deplorandum est; cum hæresibus permixta sint omnia, duces pastoresq. desiderantur, à quibus ex feminæ, ad probitatem sua sponte propensæ, dirigantur atque informentur.

ERFVRTVM, quæ urbs est in Thuringia per ampla, sed hæreticis refertissima, cum è Fuldeni Collegio Sacerdos noster negotiorum causa se contulisset, principum Catholicorum rogatus, concionem in eius vrbis templo habuit, quod Erfurdiæs hæretici, Caesaris mandato compulsi, Catholicis restituerant. Hic ea fuit patris in dicendo vis, ea populi cōprobatio, ut Moguntini Archiepiscopi Suffraganeus Sacerdotem de nostris aliquem postularit. concessusq. est illi Sacerdos cum comite fratre: cui facilis aditus in urbem fuit: edixerat enim non ita multo ante Senatus, quamvis ab Ecclesia Catholicæ sit sciunctus, ne quis in Catholicorum templis se gerezet insolentius, neue eis molestia aliiquid exhiberet, graui proposita pœna, si quis non pareret editio. nā antea magnas turbas ciebat, eòq. progreßa erat hæreticorum audacia, ut dum Catholicos agitabant, publicum quoque otium pacemq. turbarent. Itaq. patefacto ab ipsis religionis aduersarijs in urbem aditu, expeditissimus nostris cursus ad res gerendas fuit. Sacerdos in urbana curia, comes in suburbana ac rustica conciones habuerunt, & ex utrisque par quæstus, deductus autem comes in ludum litterarium, pueros docere cœpit tanta cum gratia, ut admirati confirmauerint lutherani, si nostri docere perge-

pergerent, fore ut auditores omnes desertis suis di-  
dascalis semidoctis, ad eorum sese institutionem disci-  
plinamq. conuerterent. Ac sane res eum exirum ha-  
buit adiuuante Deo, ut huc nostri frequentius sibi  
existiment excurredum, magna Catholicorum cum  
utilitate, tum voluptate. qui, si quando contingat, id  
quod à Deo vehementer optant, ut Collegium Socie-  
tatis aspiciant, sumptus & quicquid ad eam rem ne-  
cessarium est, suppeditaturos se esse promittunt. Sed  
valde sibi timent hæretici, qui primo nostrorum ad-  
uentu rumorem in vulgus sparserant, duo millia Ie-  
suitarum propediem affutura. ut autem secundo re-  
diisse vident, urbem iam ipsam ab eis occupatam,  
planeq. rem omnem proditam conqueruntur.

MOLSHEIMENSE, ET CON-  
fluentinum Collegium.

**M**O L S H E I M I quoque negotium nobis  
est cum hæreticis. mire autem eos torquet  
rerum nostrarum felicitas, & longe lateq. vagans  
opinio: neque quicquam prætermittunt, quo nobis  
vbiq. conflent inuidiam. Nostros tamen nihil à su-  
cepta animarum caufa retardat. Lustratur præter  
urbem tota vicinitas, nec ullum oppidum aut vi-  
cūs est, qui quidem ad Argentinensis Episcopi ditio-  
nem spectet, vbi partim concionibus, partim cate-  
chismo, nostrorum non elaboret industria. Quo  
quidem studio magnopere delectatus optimus Præ-  
fus, publico diplomate cavit, ne quis tam pijs conati-

T bus

bus officere audeat, quin potius pro virili faueat, liberumq. templorum usum ubique relinquat. Valuit plurimum haec praesulis commendatio apud homines probos, quorum aliqui, quo magis rem Christianae disciplinae proucheret, mille amplius catechismi codices & exempla, quae passim pueris ac multitudini diuiderentur, edenda curarunt. qua explanacione Christianae legis, non intermissis concionum praesidijs, ita Catholicorum roborantur animi, ut non solum nihil in fide laborent, sed etiam haereticis, qui buscum crebro eis agendum est, acriter strenueq. resistant. usurpant cum religione diuina mysteria, & suos ad Collegium famulos (sunt enim haeretici) ut Catholicis moribus instituantur, adducunt. quod fit, ut cum plerique pleni haeresibus hoc concedant, abeant mox optimi perfecti. Catholici. Iubilatum summa cum ceremonia conuentuq. hominum celebratum est: effecitq. Senatus, ut ne vigiles quidem custodesq. portarum a supplicationibus officijsq. diuinis abessent. itaque ea vis hominum fuit, ut nemo mansisse domi id temporis videretur. ducta est supplicationis pompa ad eadem nostram, cum tamen alias ad alia templa procedere supplicantium agmina consuefissent: ibi res diuina, sacraq. concio toto triduo habita est. Admiratione digna res fuit, haec ab Alsatiæ populis, quorum animis tantas tenellas haeresum error offundit, his temporibus fieri. Curatum a nostris est, ut fructu ex ea re quæ uberrimum populus caperet, inculcatumq. omnibus pro concione, & Iubilai quæ vis esset, & promerendi

qua

qua& facilis ratio. Confitentium magna turba fuit,  
communicantium vero tanta, ut oppidanorum pene  
numerum ex&equarit. Neque vero huius tantum  
oppidi finibus Iubilai sese vtilitas tenuit, sed Als-  
satiam peruagata est fere totam: affueruntq. in pom-  
pa Tabernis, vbi Principis Argentinensis est sedes,  
cum suo pr&asule quattuor hominum millia. Idemq.  
a finitimis Argentinæ pagis est factum, ingenti  
cum hæreticorum stomacho ac dolore. qui ne nihil  
agere ad placandam iram diuini numinis uideretur,  
publico etiam ipsi studuerunt edicto, ad p&eniten-  
tiā in audiendis paulo diligentius ministrorum som-  
nijs posita erat. precationisq. formulam, quam  
quisque sedulo recitaret, contra Romanum Pontifi-  
cem Catholicosq. compositam ediderunt. sed cum  
ea inter ipsos hæreticos minime probaretur, in ri-  
sum tota res abiit. eiusmodi quippe est omnis hære-  
ticorum religio, atque hoc demum recidunt, quæ in  
sugestis ac synagogis vomunt. Sed confessionis  
beneficio non modo animi scelerum vinculis, sed  
etiam corpora morborum leuantur incommodis.  
Nobilis Pr&asul, & Societatis fautor in primis, cum  
grauiter eset æger, mortemq. in horas singulas ex-  
pectaret, vbi animum confessione sanavit, sanitatem  
quoque corporis est adeptus. Alius item vir hone-  
stus ac clarus, cum assidua demonis pateretur iniu-  
rias, petebatur enim crebro lapidibus, nec quies vñ  
la domi forisq. dabatur; cum multa ac varia frustra  
teta&bet, denique leuationem aliā pr&eter eā, quam ei

T 2 Sacer-

Sacerdos noster attulit, non inuenit monuit pater  
delendas prius esse maculas peccatorum, si se tran-  
quillum reddere, et a dæmonibus tutum vellet. cum  
paruissest, & cum reliqua se familia frequenti con-  
fessione purgasset, tandem Christo dæmon, & luci  
tenebra concefferunt.

CONFVENTIAE in Societatem rece-  
ptus est unus res autem Collegij Dei benignitate sat  
feliciter cedunt: quamvis enim domestica interdum  
necessitas premat, excitat tamen Deus, qui suis opi-  
bus præsto sint. Treuirenſis Archiepiscopus huius  
auctoř fundatorq. Collegij, non modo multa ad ne-  
cessarium vītæ cultum ac paratum perbenigne sug-  
gessit, sed etiam quatuor talerorum millibus, hoc est  
aureorum tribus millibus & quingenis oppignerata  
quædam Collegij bona redemit. Idemq. ne uno  
tantum liberalitatis genere suam in nos benevolen-  
tiā declararet, aedem nostram sacris Treuirenſium  
Martyrum cineribus illustravit. octo in eis integra  
capita à suis auulsa corporibus cerni licet, decora  
noſtri templi, & certissima apud Deum Societatis  
noſtræ ſubſidia. Non commemorabo tum varieta-  
tem, tum pulchritudinem ſacrae vefis, non eleganti  
intexta opere aulea, nec alia minuta complura, qui-  
bus quotidie noſtrum auget ornatq. Collegium. ma-  
ior eſt etiam beneficus animus, quam ipſa benigni-  
tas: teſtaturq. niſi temporum diſſicultas aduersare-  
tur, fore ut multo plura ſuæ apud nos benevolentia  
argumenta relinqueret: ut arctiora iam vincula  
nulla ſint, quibus nos ſibi obliget ac deuiniciat.

Schola-

Scholarum numerum, custode tutoreq. Deo pesti-  
lētia nihil imminuit. quamquā enim et de ciuibus, et  
de discipulis nonnullos abstulit; nouorum tamen suc-  
cessione flos manet: eaq. de causa spectaculorū non  
negliguntur illecebræ. Expressusq. est Patriarcha  
Ioseph ea cum spectatorum admiratione ac volupta-  
te, vt danda iterum comœdia fuerit. Vt autem ad  
sapientiæ, sic ad pietatis laudē iuuentus incenditur.  
Præcurrunt, vt solent, ceteris, qui præcipuo in soda-  
litys cultu Dei Parentis dedunt. Ex his vnum cum  
alia in alios conferret egenos, tota quadragesima  
sex auditoribus, quibus angusta res erat, quotidiana  
cibaria summisit, id quod statim hebdomadæ ferijs ad  
imitandum sumpserunt alijs. His proposita est non  
modo suæ, sed alienæ quoque cōseruatio salutis. alios  
verbo, alios hortantur exemplo, & quæ Christia-  
nus ignorare non debet, ea rudibus tradunt; vitia  
corrigunt, & ad sacramenta complures eliciunt: hæ-  
reticos auocant à perfidia, & ad hæresim eiurandā  
impellunt: ex quibus Sacerdos, annum iam sextum  
& vigesimum publicum ministrum egerat. Vir au-  
tem primarius, cum ad sanitatem proxime redijisset,  
libros suos omni labore respersos, exurendos misit ad  
nos: tantumq. abest, vt consiliū pœnituerit, vt pro Ec-  
clesia iā Catholica multa à suis, quorū erat antesi-  
gnanus ac signifer, patiatur. In Iubilao capiendo ea-  
dem fere atque in alijs, quæ diximus, oppidis, tum  
pietas, tum celebritas fuit per id tēpus Iudai quat-  
tuor nostrorum opera è custodia primum educti, de-  
inde etiam ad baptismum instituti, salutari demum

T 3 aqua

aqua renati sunt. Nonnulli autem, quos in suis rebus turbidis ingens cæperat desperatio, in spē protinus, ne se ipsi perimerent, restituti. & qui necem animis iam attulerant, partim impure libidinoseq. viuendo, partim tenendis fouendisq. odijs, ad salutem & vitam reuocati.

P A D E B O R N E N S I S R E S-  
dentialia.

**I**N P A D E B O R N E N S I sede suscepta procuratione noui gymnasii, augendus quoque nostrorum numerus fuit. Ad rem Catholicam promouendam, diuino consilio comparatum est, ut huius diœcesis administrator ex clarissima Ducum familia (is qui princeps in his locis tuendæ fouendæq. heresis erat, ac proinde nostrorum studia Catholicæq. religionis cursum maxime retardabat) præter omnem expectationem miserabilis mortis genere extinctus sit. & quidem id temporis, cum maiore captus amentia de exturbandis Paderborna nostris, deq. opprimendis dissipandisq. auctiæ religionis reliquijs, sedulo cogitabat. Quæ si exsequi per diuturniorem vitam potuisset, sublata spes omnis erat reuocanda in posterum Catholicæ religionis. Boni etiam, ut Societati publicæ scholæ committerentur (quo uno maxime confidebant) id viuo Principe impetrare non poterant. deterrebat eius auctoritas, ne ea nostris procuratio à Canonicis tradere-

tur.

tur: alebat hæretorum arrogantiam tanti principis patrocinium: obstabat publicus ludimaster, qui ab eo munere, quod ei in perpetuum suo quisque chirographo canonici cauerant, salua aequitate remoueri non poterat. Itaque scholis ademptis, nulla spes maior erat tempestiue frugis. eas igitur Prouincialis pater vrgere, quoniam & cum animarum causa coniuncta res erat, & cum diuina laude nostrorum discibum minitari; negare aequum esse, ut iij frustra venisse viderentur, si præcipua consulendi animis opportunitate carerent. quo circa canonicos impulit, vt cum ludi moderatore ageant de mittendis scholis, cedendoq. Patribus iure suo. sed ille alia omnia sibi in animo esse significabat, negabatq. se quicquam de suo iure censurum: nec deerant, qui Iesuitas grauiter accusarent, quod ex alterius incommodo suum vellent commodum augere. Quam quidem suspicioneum vt nostri minuerent, docuerunt quam immores utilitatum suarum, bonum reip. semper quererent, & quam gratuita opera ciuium commodis deseruerent. velle autem, vt quod in conditionibus esset argenti, id vniuersum gymnasii rectori numeraretur. quam ille conditionem quamvis aequissimam, ægre tandem vt admitteret, est inductus. traditæq. sunt nobis scholæ ingenti bonorum omnium gratulatione, sed hæretorum inuidia non minore. Res per vniuersitatem Westphaliæ pernagata est opinione celerius: et quonia vulnerauit et transfixit hæreticos, suos illi à gymnasio liberos remouerunt,

T 4 spon-

sponsionibus decertantes, vniuersum propediē gymnasium ad exiguum auditorum numerum redditurū. Cauturi etiam Senatus consulo consules dicebantur, ne quem hospitio ciues, qui discendi gratia ad nos adire vellet, exciperent. Sed improbarum cogitationum spem tum felicia discipline nostrae primordia, tum mors Episcopi inopinata fecerit. accesserunt statim auditores centum & quadraginta, quos nostri & instituendi ratione, & dialogorum spectaculis sic oblectant, ut verendum sit potius, ne futuram auditorum multitudinem exedrae visitatæ non capiant, quam ut de eo, quem dixi, numero dies detrahatur. quid multa? breui ea de nobis apud eos, qui propter morum religionisq. dissimilitudinem acerbo in nos sunt animo, excitata est opinio, ut quamvis nos erroris accusent; tribuant tamen & doctrinæ copiam, & erudiendæ iuuentutis scientiam. quam nos opinionem ut diuinæ gloriæ caufa tueremur, comœdiam dedimus aliam perelegantem: discipulorumq. diligentiam frequenti hominum cœtu, cum præriorum muneribus, tum honore laudationis ornauimus. ita eos fere omnes, quos è ludo nostro hæretici parentes abduxerant, à suis ipsi magistris nullo ad nos negotio reduximus; quotidieq. nouos auditores admittimus: ut iam numerus ad trecentos breui perueniat, quem immunitum iri minitabantur aduersarij. Institutæ porro sunt in domèstico sacello Christianæ doctrinæ scholæ, quæ cum ab auditoribus nostris, tum ab alijs non exiguo numero celebrantur; quanta cum eorum vii litate

litate, non facile dixerim. nam cum hoc genus hominum in earum rerum, quæ Christiano nomine continentur, magna ignoratione versetur, fit, ut à sua feritate ad Christianam mansuetudinem ac modestiam, catechismi institutionibus sensim defluat. antea enim prodigijs simile videbatur, si quis vel signum Crucis deducta à capite ad pectus manu describere visus esset, vel caput ipsum ante sanctissimam Eucharistiam religiosa corporis inclinatione nudare. nunc puerilis atas sic imbuitur, vt catholicæ Ecclesiæ ritus & mores exprimat, nihilq. quod ad declarandam profitendamq. religionem pertinet, prætermittat. Quæ cum ciues animaduertunt, nullum faciunt admirandi finem, & longe aliter de Societate sentiunt ac prædicant.



PRO-